

# DE ŒDEMATĒ. THESES ANATOMICO - CHIRURGICÆ,

*Quas, DEO JUVANTE, & Præsidi M. TUSSANO  
BORDENAVE, Artium & Chirurgiæ Magistro,  
Scholarum antiquo Præposito, Professore Regio, Regiæ  
Chirurgorum Academiæ Consiliario, & pro commercio  
extraneo Secretario, Academiæ Florentinæ socio,  
tueri conabitur, FRANCISCUS LE MONNIER, Parisinus,  
in almâ Universitate Parisiensi artium liberalium Ma-  
gister: Theseos author.*

P A R I S I I S,  
IN REGIIS CHIRURGICIS SCHOLIS;

*Die Sabbati, 7<sup>a</sup>. mensis Septembris, à sesqui-secundâ post meridiem ad  
septimam. Anno R. S. H. 1765.*

PRO ACTU PUBLICO  
ET  
MAGISTERII LAUREÆ



Typis P. A. L. LE PRIEUR, Regii Chirurg. Collegii  
Typographi.

---

M. DCC. LXV.

H

\_\_\_\_\_





*D. O. M.*  
 DE ŒDEIMATE.  
 THESIS  
 ANATOMICO-CHIRURGICÆ.



TA constitutum est à naturâ corpus humanum, ut sanitate non semper gaudeat. Modò turbatur ordo, quo diversa hujus-ce mirandæ machinæ instrumenta moventur; languent & contabescunt corporis functiones; inordinate agitur œconomia animalis: aucto sanguinis circuitu, velocius impelluntur liquores, intrâ vasorum angustias ingurgitantur, hærent, mutantur; imminuto ejusdem motu, stagnant, & morâ varias morborum ansas producant: sic corpus unde quæque premit innumera malorum caterva.

INTER morbos ab imminuto fluidorum motu frequentius oritur œdema; de ipso dicturi tegumentorum communium anatomem exponemus.



TEGUMENTA communia duo tantum numerantur; cutis & membrana adiposa; exterior illa totum corporis habitum obtegit; pro diversis partibus vel densior, vel rarior est: hæc verò tenuior priori substernitur.

CUTIM quadruplici partium serie conflare existimant Anatomici. Prima interior corium sive cutis dicitur: hæc membrana fortis, crassa pro diversitate partium & animalium; omnium generum vasculis perfusa, copiosa nervis, extensionis & contractionis capax, fibris tendineis, vasculosis, nervosis mirè ad modum complicatis constat.

SUPER exteriorem cutis partem assurgunt papillæ, quæ ab expansione nervorum cutis producuntur: sublaris cuticulâ, textu que reticulari, conspiciuntur in linguâ; difficilius deteguntur in apice digitorum; in totâ verò corporis superficie per analogiam & usus demonstrantur. Hæ autem papillæ, in linguâ animalium facilius conspicuæ, multum inter se differunt ordine & figurâ.

PARS tertia vocatur reticulum cutaneum, vel corpus reticulare Malpighii: ipsius substantia mollis, mucilaginosa, coherens, calore concrevens, innumeris foraminulis pertusa, cuticulæ subjacens, huicque firmiter adhærens, papillarum basin investiens, ipsisque recipiendis accommodata. Dubium est utrum potius à cute quam à papillis & cuticulâ pendeat, vel membranam ab aliis distinctam efformet: nam ex nervorum exuviis natam esse putant alii; alii ex fibrillis diversimodè intertextis per cutis exteriora excurrentibus conflare volunt; clarissimus Winslow ab extremis minutissimorum capillarum propaginibus efformari existimat. Ipsi color hominum, & præcipuè nigrities Æthiopum, adscribuntur.

Hic mirandus cutis apparatus, tenuissimâ membranâ conregitur; hinc cuticula seu epidermis, vel juxta veteres cutis efflorescentia. Plus minùs ve crassa pro diversis partibus, totum corpus ambiens, cuti firmiter adhærens, magis aut minùs pellucida, nullo sensu donata, innumeris perforata poris, minutissimis lamellis, quasi squammis arctè tamen coherentibus, constat. Attractu rudiori, compressione, calore inspissatur.

EXTERIUS fulci reperiuntur ibi profundiores, leviores ibi; in apice digitorum spirales.



§  
EA est ab Anatomicis descripta cutis structura ; verùm si attentius consideretur ea pars cutis , quæ corium dicitur , quando vel aëre distenditur in Emphysemate , vel aquâ perfunditur in Œdemate , tunc in textum cellularem resolvi patet. Corium ergò textus cellularis est , & ab eo tantùm discrepat , quòd lamellis firmiùs inter se cohærentibus , constituatur.

DUM corpus obtegit cutis , tactum etiam præstat per totum corporis ambitum , tamèn in apice digitorum præsertim annotandum ; huic sensationi præ cæteris dicantur papillæ , cui etiam famulantur variæ cutis partes ; dum enim papillas ambit , sustinet reticulare corpus , faciliùs afficiuntur extrema nervorum ; tactum moderatur cuticula ; hæc sublatâ sequitur sensatio molesta ; densatâ verò tactus deperditur.

ALTERUM tegumentum commune , membranæ adiposæ nomine donatur.

TEXTURA ipsius membranacea , diversimodè intricata , per plurimos loculos habens , diversæ magnitudinis , inter se communicantes. Crassities varia à multiplici foliorum serie pendet : illud textum cuti firmiter adhæret , musculos generatim pervadit , eorum fibras complectitur , ad interiora progreditur , & cum membranis abdomen & thoracem vestientibus jungitur : denique per totum corpus extenditur. Hæc probant disquisitio anatomica & experientia.

IN cellulis succus vel humor oleosus reperitur , majori vel minori liquiditate donatus , prout in his vel illis cellulis consideratur.

CELLULAS plurima perreptant vasa sanguifera folliculos adeuntia ; ex his oriuntur ductus peculiare quibus secernitur humor iste oleosus , quo cutis à frigoris sævitiâ deffenditur , musculorum aliarum que partium flexio servatur ; intrâ cellulas depositus humor loca vacua replet , pulchritudini inservit ; motum faciliorem præstat , dolorificum attritum prohibet , ut in plantis pedum , volis manuum : denique penuriæ tempore , corpori alimenta præbet.

## §. II.

TUMOR mollis , pallidus , frigidus , tactui cedens , sæpiùs absque sensu , aut cum dolore tensivo tantùm , à sero sanguinis ingurgitato vel effuso formatus , Œdema dicitur.

HUJUS-CE tumoris diversa natura distinctioni aditum faci-



lem præbet; nam *Œdema*, vel est simplex, si à parte tantum serosa producitur, vel præsentia aliorum apostematum complicatur, unde nomen apostematis retinet, verbi gratia, *Œdema erysipelatosum*, *Œdema phlegmonosum*; nisi præeat sensibilis affectio, primitivum; subsequens verò habetur, si aliquo morbo antea laboraverit æger. Quod unam vel etiam plures partes occupat, privatum dicitur, & *Œdematis* nomen retinet; totum verò corporis habitum afficiens, seu universale, *anasarca*, seu *leucophlegmatia* audit.

PARS corporis quæ hoc-ce morbo afficitur, vim elasticam aliquando servat, unde post compressionem, digito factam, pristinum ferè statum obtinet; aliàs mollitie donatur, & illâ vi elasticâ privatur; hinc alia *Œdematis* species; prior nomine ingurgitationis, altera effusionis seu infiltrationis designari possunt: in priori casu intrâ vasa propria; in altero extrâ vasa efformatur *Œdema*.

NON una ergò eademque hujus-ce mali sedes, idèoque in textu cellulari non semper repetenda.

IN vasis lymphaticis abundantia partis serosæ & stagnatio, vel ejus in textum cellularem infiltratio, statuunt causam morbi proximam.

HANC autem feri statim, aut infiltrationem produciunt plurimæ causæ remotæ, quæ sunt tum internæ, ut copia feri, fluidorum inspissatio, aut dissolutio, compressio & elaterii vasorum imminutio: tum externæ, ut palustrium locorum vicinia, frigus acre & humidius, vigiliæ, alimentorum viscosæ & glutinosæ indolis nimius usus, ligaturæ & compressiones externæ, strangulatio ab inflammatione membranarum, aut aponevrosium, motus nimius, quies immoderata, aliæque per plurimæ.

*ŒDEMATIS* naturam multiplex signorum series indicat; varia pro variâ specie.

SIGNA commemorativa hîc non omittantur, nam inde diagnostica & prognostica faciliùs elucescunt. Si enim tumor mollis, pallidus, tactui cedens, absque sensu, partis gravitas, cutis plus minusve tensa signa diagnostica censentur; tamen ex cognitis rebus morbum antecedentibus, deducitur *Œdematis* species, causæ dilucidantur, morbi stadia evolvuntur; sic accuratiùs explanatâ morbi naturâ, media Therapeutica certiùs & utiliùs applicantur. A parte affectâ, morbi causâ, ætate,



viribus ægri, temporibus & exitu Œdematis deducenda est prognosis.

SUA sunt Œdemati tempora, principium scilicet, incrementum, status & decrementum: at prout diversimodè percurrunt illa tempora varium finem obtinet: hinc si lymphæ stagnans vias circulationis remeet, symptomatum minutione, resolutio: si aucto sanguinis motu in parte oriatur inflammatio, quandoque, licet rariùs, sequitur suppuratio: si mors partis eveniat, gangræna: si, humore subtiliori evanescente, materies crassior remaneat, induratio: si, vasorum viam subito repetat materia, delitescencia. Inter hos exitus, frequentior est resolutio; sæpe accidit gangræna; raro fit suppuratio legitima. Resolutio ergo, quantum potis est, tentanda; præcavendæ que suppuratio & gangræna. Hinc, præter indicationes generales, pro diverso Œdematis exitu, varia etiam adhibenda curationis norma.

Tria in œdematis curatione observanda veniunt:

- 1<sup>o</sup>. Exitum facilem serosæ parti præbere.
- 2<sup>o</sup>. Omnes causas quibus humor affluit, vel illius reditus impeditur, tollere.
- 3<sup>o</sup>. Partes corroborare, tum ut humor stagnans expellatur, tum ut novi humoris affluxus impediatur.

I. PARTI serosæ stagnanti exitus conciliatur per urinas, per alvum aut sudores.

URINAS promovent plantæ diureticæ, ut aquifolium, enula campana, eryngium, fructus alkekengi, &c.; nitrum purificatum, crystallum minerale, sal mirabile Glauberi, nec non arcanum duplicatum, minori dosi administratum, millepedes, aliaque; quibus ptisanæ, boli, succi, opiata componuntur,

PURGANTIA hydragoga alvum relaxant; sorbitiones viperinæ, ptisana cum milio & caricis composita, sarsaparillæ, assafras, guiaci, decocta sudores provocant. Per hanc aut illam viam, quandoque per plures, simul, prout fert morbi natura, aut ægrotantis indoles, evacuatio sollicitanda.

II. LICET sæpiùs remediis modò præscriptis feliciter cedat Œdema, præsertim à causâ internâ ortum, siquidem his remouentur morbi causæ, cum tamen quandoque à vitio partis pendeat, fibræque nimium laxæ sero stagnanti moram præbeant, tunc utiliter applicantur, decoctum origani, thymi,



salicæ, salviæ cum vino vel cum aquâ cui adjungitur paululum aquæ vitæ, aut spiritûs vini; si serum crassius & inspissatum partis ingurgitationem offerat, tunc competunt ressolventia spirituosa, ut aqua vitæ camphorata, vel sola vel cum sale ammoniaco immixta, sarmenti lixivium, aquæ thermales, &c. hæc autem non adhibeantur, nisi præeant remedia interna, quibus serum redundans, foras eliminetur.

TANTA est quandoque partis ingurgitatio, ut vasa distensa atoniâ afficiantur, serumque stagnans repellere nequeant; tunc magis ac magis pars ingurgitata distenditur, rupturæ que videtur proxima. Cum autem rupturam sæpius sequatur gangræna, hanc præcavere artis est. Ad hunc finem præstant leviores incisiones hic & illic institutæ, quibus cellulæ tantum ad superficiem aperiuntur; his gradatim evacuatur serum, applicatisque spirituosiss, aut resolventibus, tonus partis restituitur. Scarificationes, aliæve profundiores incisiones sedulo vitentur; ex his enim subito collabuntur partes, actioneque vitali orbata, gangrænâ afficiuntur.

ŒDEMA ab inflammatione membranarum subsequens, sanguinis missione, topicisque emollientibus, laxantibus, tractandum. Si adsit strangulatio in parte à membranis aut aponeurosis inflammatis, competunt profundiores incisiones; tunc frustra in usum vocarentur ressolventia, aut spirituosa; modò accidentia pejora aut gangræna sequerentur. Ligaturæ aut compressiones, si adsint, removendæ. Attentè ergò discutiendæ singulæ Œdematis causæ, ut morbus feliciter debelleretur.

III. EVANESCENTE sero, pro tertiâ indicatione, corroborantia adhibenda, ut tomentationes aromaticæ cum vino, aqua calcis, aqua vitæ; cataplasmata cum foliis sambuci spiritu vini irroratis; vel cum pulpâ asphodeles, cucumeris sylvestris; cataplasmata corroborantia, astringentia, aliaque vaporum actionem stimulantia, frictiones exteriores, & calidæ, motus moderatus. Alimenta corroborantia, carnes assatæ, potus generosi, pro morbi & ægrotantis statu in Œdematis curatione non omittantur.

**FINIS.**